

Mellembølgekkut nassitsissutip atorunnaarsinneqarsimasup 2013-ip ingerlanerani taartigisinnaasaannik periarfissiisoqaqqinnissaa anguniarlugu Naalakkersuisut suliniuteqaqqullugit Inatsisartut aalajangiiffigisassaattut siunnersuut.

(Inatsisartuni ilaasortaq Debora Kleist, Inuit Ataqatigiit)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Siullermeerneqarnera

Apeqquut, sumiiffinnut avinngarusimasunut kortbølgekkut nassitsissutinik, KNR radiukkuut aallakaatitanik siaruarterissutinik ikkussuinissamut tunngasoq pillugu qujavunga

Mellembølgekkut nassitsissutit 1980-imeersuugamik – taamaattumillu ukiunik 30-erpianik pisoqaassuseqaramik – atorunnaarsinneqarput. Taamaattumik ukiuni tulliuuttuni aserfallatsaaliortariaqarnerat annertusiartortussaavoq. Tamatuma saniatigut nassitsissutinut taamaattunut kingoraartissanik sanaartortoqarunnaarsimavoq. Tamatuma kingunerisaanik KNR mellembølgekkut nassitsissutit atorlugit aallakaatitsisarnerminik ingerlatsiinnassappat, nassitsissutinut nutaanut aningaasaliissutissat amerlasuut pisariaqartinneqartussaapput.

KNR-radio FM-ikkut nassitsissutit aqutigalugit illoqarfinnut nunaqarfinnullu aallakaatinneqartareemat, aningaasaliissutissat taakku atorneqarnissaat inuiaqatigiit aningaasaqarnerat eqqarsaatigalugu illersorneqarsinnaanngitsoq taamanikkut Naalakkersuisut naliliipput, taamaattumillu nassitsissutit matuneqassasut aalajangiisoqarpoq.

FM-ikkut nassitsissutit aqutigalugit siaruarterinerup saniatigut nunaateqarfinnut nalunaarsorsimasunut aaqqiissutissanik immikkut ittunik pilersitsisoqarpoq, taamaalillunilu nunaateqarfinni taakkunani najugaqartut radiukkuut tv-kkullu aallakaatitanik angerlarsimaffimmini tiguisinnaalerput.

Taamaattorli mellembølgekkut nassitsissutit matuneqarnerat imarsiornermi ajunaalernermi isumannaallisaanermilu sullissinernut pingaaruteqanngilaq, sullississutit taakku atortut allat atorlugit ingerlanneqarmata.

Mellembølgekkut nassitsissutit matuneqarnerini VHF-ikkut silassaq ullormut sisamariarluni tusarnaarneqarsinnaalerpoq. Aalajangiiffigisassatut siunnersuummi takuneqarsinnaasut sumiiffiit ilaanni VHF-ikkut attaveqaatit anngussinnaanngillat. Kisiannili erseqqissaatigineqassaaq, aamma kortbølgekkut nassitsissutini ilaatigut silaannaap pissusai, soorlu seqernup milai peqquutaallutik attaveeruteqattaartoqarsinnaammat. Seqinermi pisoqangaatsiartillugu, soorlu maannakkut taamaattoq, tamanna nassitsissutinut sunniuteqarnerlussinnaavoq. Kortbølgekkut nassitsissutinik pilersitsisoqaraluarpalluunniit naatsorsuutigineqartariaqarpoq nunami sumiiffiit ilaanni silassap tusarnaarnissaa ajornartussaasoq.

Nassitsissutit matuneqarnerini ingerlatsinerimi sipaakkat nassitsissutit digitaliusut nutaat ingerlanneqarnerinut atorneqarput. Taamaattumik matusineq nutarteriniarluni suliniuteqarnermut tamarmiusumut ilaasutut isigineqassaaq. Nutarteriniarluni suliniutini nunap iluani nassitsissutitta nutartertuarnissaat qulakkiissavarput. Atortut digitaliusut pilersinneqarnerini tv-kkut aallakaatitat assitaat pitsaalluinnartut nuna tamakkerlugu tigooqqarneqarsinnaalerput, kisiannili pingaartumik nunaqarfinni assit pitsaanerulernerat misigineqarpoq, tamatumalu saniatigut kanalit sisamanik ilaneqarput, ilaatigullu Inatsisartuni oqallinnerit toqqaannartumik aallakaatinneqarsinnaalernerat periarfissinneqarluni. Taamaattumik Naalakkersuisut ataatsimut isigalugu isumaqarput, nutarteriniarluni suliniuteqarnerup kingunerisaanik innuttaasut ullumikkut siornatigumut naleqqiullugu paasisstissanik pissarsisarnerat annertusisimasoq, nassitsisarnermut pissutsit pitsanngorsimasut kiisalu takusassat amerlisimasut.

Soorlu siunnersuuteqartup uparuaraa, mellembølgikkut nassitsissutit matuneqarnerisa kingorna nunatsinni innuttaasut ilai, assersuutigalugu pinngortitami angalaarnerminni KNR raatiumik tusarnaarissaminnik periarfissaqanngillat. Tamanna amerlasuunit maqaasineqarpoq. Taamaattumik Naalakkersuisut siunnersuuteqartup anguniagaanut isumaqataapput: Innuttaasut illoqarfiit nunaqarfiillu avataanniinnerminni KNR-imik tusarnaarsinnaanissamut qularnaariffigineqassasut.

Kisiannili Naalakkersuisut isumaqarput, kortbølgikkut nassitsissutinik pilersitsinissarpiaannaq aallutissallugu naapertuutinngitsoq, taamaattumik allanik aaqqiissutissanik nassaartoqarsinnaanersoq misissuinissamut akuerineqarnissaq, aammalu tamatuma sukumiisumik qulaajareernerani Inatsisartunut saqqummiussisinnaanissartik Naalakkersuisut kissaatigaat.

Inuiaqatigiit kalaallit millionilikkaanik aningaasaliinialinnginneranni ujaqqat tamarmik muminneqarsimanissaat pingaaruteqartoq Naalakkersuisut isumaqarput, taamaalilluta pitsaanerpaamik – aammalu siunissamut qulakkeerinninnerpaamik – innuttaasunut tamanut aaqqiissuteqarnissaq angusinnaaniassagatsigu.

Aningaasaqarnikkut inissisimanerput eqqarsaatigalugu mellembølgikkut nassitsissutinut taartissanik sanaartornissamut ingerlatsinissamullu Nunap karsia aqutiginagu allatut iliorluni aningaasalersuisoqarsinnaanersoq aamma misissorneqartariaqarpoq.

Taamaattumik Naalakkersuisut kaammattuutigissavaat aalajangiiffigisassatut siunnersuutip ataatsimiititaliami suliarineqarnissaa innersuussutigineqassasoq, taamaalilluni ataatsimiititaliaq immikkoortup aappasaanerqarnissaanut, illoqarfiit nunaqarfiillu avataanni KNR raatiup tusarnaarneqartarnissaanut periarfissanik tamaginnik misissuinissamik Naalakkersuisut peqquneqarnissaat kiisalu allatut aningaasalersuinissamut periarfissanik qulaajaanissaannik kaammattorneqarnissaat pillugu allannguutissatut siunnersuummik saqqummiussisinnaaniassammat.

Taamatut oqaaseqarlunga siunnersuut Inatsisartuni suliassanngortippara.